



**HOTUBA YA KATIBU MKUU OFISI YA RAIS,
MENEJIMENTI YA UTUMISHI WA UMMA NA UTAWALA
BORA, DKT. LAUREAN J. P NDUMBARO, KATIKA
UFUNGUZI WA KIKAO KAZI CHA TATU CHA SERIKALI
MTANDAO FEBRUARI 08, 2023 KATIKA UKUMBI WA
AICC ARUSHA.**

*Mhe. Deogratius Ndejembi (Mb); Naibu Waziri Ofisi ya Rais,
Menejimenti ya Utumishi wa Umma na Utawala Bora,
Mhe. Felician Mtahengerwa; Mkuu wa Wilaya ya Arusha,
Dkt. Mussa Kisaka, Mwenyekiti wa Bodi ya Wakurugenzi,
Mamlaka ya Serikali Mtandao,
Mhandisi. Benedict Ndomba, Mkurugenzi Mkuu Mamlaka ya
Serikali Mtandao,
Wakurugenzi wa Halmashauri, Mashirika na Taasisi Mbalimbali,
Wakuu wa Idara za Tehama na Watumishi kutoka Taasisi
mbalimbali;*

Wakurugenzi, Wakuu wa Vitengo, na Watumishi wa Mamlaka ya Serikali Mtandao;

Waandishi wa Habari;

Mabibi na Mabwana;

Nawasalimu kwa Jina la Jamhuri ya Muungano wa Tanzania,

Serikali Mtandao pamoja tunatekeleza

Kwanza namshukuru Mwenyezi Mungu mwingi wa Rehema kwa kutujaalia uzima, afya njema na kutukutanisha hapa leo.

Mhe. Naibu Waziri; napenda kukushukuru kwa kutenga muda na kuja hapa kushirikiana nasi katika Kikao Kazi cha Tatu (3) cha Serikali Mtandao kilichoandaliwa na Mamlaka ya Serikali Mtandao (e-GA) kwa kushirikiana na Ofisi ya Rais, Menejimenti ya Utumishi wa Umma na Utawala Bora. Tunafarijika sana kuwa nawe, pamoja ya kuwa wewe ni Muhusika Mkuu wa Kikao Kazi hiki, kwa niaba ya watendaji wenzangu tunasema “karibu sana”.

Aidha, napenda kuwashukuru viongozi wote wa Serikali, Mashirika na Taasisi za Umma na binafsi, Watumishi kutoka Taasisi mbalimbali za Serikali, Watumishi wa Mamlaka ya Serikali Mtandao na Waandishi wa Habari kwa kukubali na

kutenga muda wenu kuja hapa kushiriki nasi katika Kikao Kazi hiki.

Mhe. Naibu Waziri; Hiki ni Kikao Kazi cha Tatu (3) cha Serikali Mtandao, ambacho kinalenga kuwakutanisha wadau mbalimbali wa Serikali Mtandao kutoka katika Wizara, Mashirika na Taasisi za Umma ili kujadiliana kwa pamoja hali ya utekelezaji wa jitihada za Serikali Mtandao nchini. Vikao vya aina hii vimekuwa na manufaa makubwa kwani, jitihada za Serikali Mtandao nchini zimekuwa zikiimarika siku hadi siku kupitia mawazo mbalimbali yanayotolewa na washiriki katika vikao hivi.

Mhe. Naibu Waziri; Kupitia Vikao Kazi hivi, Mamlaka ya Serikali Mtandao chini ya usimamizi wa Ofisi ya Rais, Menejimenti ya Utumishi wa Umma na Utawala Bora, imekuwa ikitekeleza maazimio mbalimbali yanayotokana na mawazo au ushauri unaotolewa na washiriki wa vikao hivi, ambayo kwa kiasi kikubwa yamechangia kuendelea kukua na kuimarika kwa Serikali Mtandao hapa nchini.

Mhe. Naibu Waziri; Napenda kukukumbusha kuwa, katika kikao cha Wakuu wa Idara/Vitengo vya TEHAMA Serikalilini kilichofanyika tarehe 28 na 29 Aprili, Mwaka 2022 katika Chuo

Kikuu Dodoma, jumla ya maazimio 12 yaliafikiwa ambapo Mamlaka ya Serikali Mtandao ilipewa jukumu la kusimamia utekelezaji wake.

Miongoni mwa utekezaji wa maazimio hayo ni pamoja na Mamlaka ya Serikali Mtandao (e-GA) kuendelea kusimamia uzingatiaji wa Sera, Sheria, Kanuni, Viwango na Miongozo ya Serikali Mtandao kwa Taasisi za Umma.

Mhe. Naibu Waziri; Katika kipindi kifupi cha utawala wa Serikali ya Awamu ya Sita, Mamlaka ya Serikali Mtandao (e-GA) imeendelea kuweka mazingira wezeshi yaliyosaidia Taasisi za Umma kutumia TEHAMA katika kuboresha utekelezaji wa majukumu yake na kutoa huduma bora kwa Umma.

Mhe. Naibu Waziri; Mafanikio yanayopatikana katika utekelezaji wa jitihada za Serikali Mtandao yanatokana na ari na utashi wa Viongozi, Watendaji na Wadau wengine. Kwa upande wa Serikali, tumeweka mazingira mazuri ya kisera, kisheria, na kiusimamizi ili kuhakikisha matumizi ya TEHAMA yanakuwa yenye tija na ufanisi unaoboresha utendaji kazi

utoaji wa huduma kwa umma, pamoja na kuwaondolea kero mbalimbali.

Mhe. Naibu Waziri; Mafanikio haya pia yamechagizwa na uzingatiaji wa misingi ya kiutendaji na kitabia, ambayo ni: uadilifu, uaminifu, ubunifu, kuthamini wateja, kufanya kazi kwa pamoja na weledi. Ni wazi kuwa misingi hii imesaidia Mamlaka kuendelea kuwa Taasisi imara na inayoaminika. Ikumbukwe kuwa, utekelezaji wa jitihada za Serikali Mtandao ni moja ya maeneo muhimu ya maboresho yaliyofanyika na yanayoendelea kufanywa katika Utumishi wa Umma, ambayo yamesaidia kuboresha utendaji kazi na utoaji wa huduma kwa Umma.

Mhe. Naibu Waziri; Kama alivyoeleza Mkurugenzi Mkuu wa Mamlaka ya Serikali Mtandao, katika taarifa yake kuwa, Tarehe 12 Julai, 2022, Mamlaka ilitimiza miaka 10 tangu ilipoanza kutekeleza majukumu yake na kubainisha mafanikio mbalimbali ambayo imeyapata, naomba niseme wazi kuwa, Ofisi ya Rais, Menejimenti ya Utumishi wa Umma na Utawala Bora imejipanga kuendelea kuijengea uwezo ili ijizatiti katika kutekeleza majukumu yake ipasavyo.

Mhe. Naibu Waziri; Tunapoadhimisha miaka kumi (10) tangu kuanzishwa kwa Mamlaka ya Serikali Mtandao, Ofisi ya Rais, Menejimenti ya utumishi wa Umma na Utawala Bora imejipanga kuboresha utendaji kazi katika taasisi za umma, pamoja na kupanua wigo wa upatikanaji wa huduma mtandao kwa umma. Sanjari na hilo sisi watendaji tumedhamiria kuunga mkono juhudi za Serikali za kuleta mageuzi katika utoaji wa huduma za Serikali kidijiti.

Mhe. Naibu Waziri, Mageuzi katika utoaji huduma za Serikali kidijiti yanatekelezwa na wataalam wa TEHAMA waliopo Mamlaka ya Serikali Mtandao (e-GA) na Taasisi nyingine za Umma, na kwa kushirikiana na wadau wengine wa TEHAMA. Hivyo, nitumie fursa hii kukuhakishia kuwa sisi wasaidizi wako tuko tayari kuendelea kuchapa kazi kwa bidii na ubunifu mkubwa ili kufikia lengo la **Rais wa Jumhuri ya Muungano wa Tanzania, Mhe. Dkt. Samia Suluhu Hassan** la kuwa na Utumishi wa Umma wa Kidijitali katika kuboresha utoaji wa huduma.

Mhe. Naibu Waziri; Kwa hakika Ofisi ya Rais, Menejimenti ya Utumishi wa Umma na Utawala Bora inaridhishwa na utendaji kazi wa Mamlaka kwa kuwa imeweza kufanya mageuzi ya TEHAMA na kuboresha utendaji kazi wa kila siku katika taasisi

za umma na utoaji wa huduma kwa umma, kufanya zipatikane kuwa rahisi, haraka na kwa gharama nafuu.

Mhe. Naibu Waziri; Nachelea kusema mengi kwani jukumu langu si kutoa hotuba, bali ni kuongea maneno machache ili kukukaribisha wewe kuja kuzungumza na hadhira hii, ukiwa Mwenyeji wa ugeni huu ulio mbele yako. Hivyo basi, nihitimishe kwa kukushukuru tena wewe pamoja na Washiriki wote waliohudhuria Mkutano huu, Karibuni sana.

Sasa naomba nikukaribishe rasmi **Mhe. Deogratius Ndejembi (Mb) Naibu Waziri Ofisi ya Rais Menejimenti ya Utumishi wa Umma na Utawala Bora,** ili uzungumze na hadhara hii, na hatimaye kufungua Kikao Kazi Cha Tatu cha Mamlaka ya Serikali Mtadao, Karibu.

Nawasalimu kwa jina la Jamhuri ya Muungano wa Tanzania Kazi iendelee.

Serikali Mtandao pamoja tunatekeleza

Asanteni sana kwa kunisikiliza